



16. august 2024

UKA 2024/143

Matumuuna Inatsisartut maleruagassaanni § 36 malillugu apeqquteqaat aallaavigalugu oqallisissatut una siunnersuutigaara:

Peqqissaasunnigornianut praktikkerfissat qanoq amerlisissinnaanerigut apeqquteqaat aallaavigalugu oqallinnissamik siunnersuut.

(Inatsisartunut ilaasortaqaq Anna Wangenheim, Demokraatit)

Peqqissaasunik ilinniarsimasunik pisariaqartitsigaluttuinnarneq aaqqiissuteqarfiginarlugu pisariaqarluinnarpoq praktikkerfissat amerlineqarnissaat. Isumaga malillugu tamanna arlalinnik sammiveqarluni pulaffigineqarnissamik pisariaqarpoq, tassani taartaasartut aqutissiuussisutut atornerisigut, aqutissiuussisussanik ilinniartitsinernik aammalu ilinniarfeqarfiit Peqqinnissaqarfiullu akornanni suleqatigiinnerup annertusineratigut. Taamaaliornikkut maani nunatsinni peqqissaasunik immitsinnut pilersornerulissaagut aammalu peqqinnissaqarfimmik qajannaatsumik atasinnaasumillu qulakkeerinniffiussalluni.

Peqqinnissamat ataatsimiititaliarsuup nalunaarusiaani kingullermi peqqissaasunnigorniat ilungersunartumik praktikkerfissanik amigaateqarnerat erseqqissaatigineqarpoq, peqqissaasunik nutaanik ilinniagaqarnermut akornutaasumik. Taanna ajornartorsiut imminut assortorpoq, tassami peqqissaasutut ilinniarnissamat qinnuteqartut amerliartormata. Praktikkerfissat amerlinissai pisariaqarpoq qulakkeerniarlugu, ilinniartut amerlanerusut ilinniakkaminnik naammassinnittarnissaat peqqinnissaqarfiup pitsaasumik ineriartornissaanut tapersiiniassammata.

Praktikkerfissat amerlanerusut kingunerissavaa, peqqissaasunnigorniat amerlanerit ilinniakkaminnik naammassinninnerat, peqqissaasut ilinniarsimasut amerlanerulerlutik. Nunanit allanit sulisussanik isumalluuteqarnermik annikillisaataassaq peqqissutsimullu tunngasunik piginnaasanik piorsarsimassutsimillu paasinninneq piffinni nukittorsassallugu. Peqqissaasut ilinniarsimasut amerlanerulernerisa peqqinnissaqarfiup pisinnaasai pitsaassusaalu qaffassarsinnaavaa, napparsimasunik passussinermik, isumassuinermik paaqqinninnerullu pitsaanerulerneranik malitseqarsinnaalluni.

Soorunami aamma unammillernartortaqassaaq praktikkerfissat amerlineri. Siullertut aqutissiuussisunik amigaateqartoqarpoq. Aqutissiuussisut piginnaaneqarluartut ilitsersueqataallutillu tapersersueqataasarput ilinniartut praktikkernerisa nalaanni. Naammanngitsumik aqutissiuussinerup ilinniartitaanerup pitsaassusaanik ajoqusiinnaavoq.

Aappasaatut praktikkerfissat amerlanerusut peqqissaavimmi sulisooreersunut suleruleeqisunut, suli annertumik suliakkersornerannik kinguneqarsinnaavoq.

Pingajussaanik aningaasarpassuarnik nukinnillu annertuumik pisariaqartitsisoqassaaq soorlu atortorissaarutinut, atortussanut sulisunullu.

Unali qularutissaanngilaq, tassalu, maannakkutut ingerlaneq attatiinnarsinnaanngikkipput. Aaqqiissutissarsiortariaqarpugut, qanoq ililluta tamanna qimakkiartuaarsinnaanerlugu, nunani tamalaani



peqqinnissakkut ilungersunartorsiorneq, peqqinnissaqarfimmi sulisunik ilinniarsimasunik ilungersunartumik amigaateqartuarnerup kingunerisaanik.

Demokraatit kissaatigaat peqqissaasutut taartaasartut piffissami sivikitsuinnarmi taartaasartut peqquneqarnissaannik aqutissiuussisutut atuuttarnissaannik periarfissaqarnersoq oqallisigissallugu. Taamaaliornikkut praktikkerfissat amerlineqarsinnaapput sulisut aalajangersimasut ulapereeqisut tatisimangikkaluarlugit. Taamaaliornernerup ilinniartut periarfississavai ilinniagaqarnissaannik misilittakkanut immikkullu ilisimasassaannik. Taassuma pitsaaqutigaa aqutissiuussisunik amigaateqarnerup tuaviortumik aaqinneqarnera aammalu ilinniakkap nikerartuunissaanut allanngorartuunissaanullu tapertaassalluni. Pitsaanngequtai ukuusinnaapput taartaasartut suliffeqarfimmut sivilisuumik attuumassuteqanngissinnaanerit, tamana aqutissiuussinerup kipisaqattaanngitsumik pitsaassusaatalu amigaatigineqarsinnaanera. Aammattaaq soqutigisaqatigiinnermut aporaaffiusinnaavoq aammalu taartaasartup tungaaniit tunniusimanginnermik kinguneqarsinnaalluni.

Aaqqissuutissatut siunnersuut alla unaasinnaavoq aqutissiuussisutut ilinniarnermut aningaasaliissutit amerlineri. Aqutissiuussineq patajaattoq pitsaasorlu anguniarlugu peqqissaasooreertunut pikkorissaanernut ilinniaqqinnernullu aningaasaliisoqarsinnaavoq, amerlanerit aqutissiuussisutut ingerlatsisinnaaniassammata. Tulliattut periarfissaqarpoq peqqissaasutut ilinniarsiup peqqinnissaqarfiullu annertunermik suleqatigiissinnaanerit. Taamaaliornikkut praktikkerneq ilusilersorluarnerusumik nukinnillu atuilluarnerunermik ingerlanneqartoq pilersinneqarsinnaammat.

Aamma misissorneqarsinnaavoq peqqinnissaqarfimmut kommuninullu aningaasatigut iluanaarutissaliineq, praktikkertunik tigusinermi praktikkerfissat amerlinerini aningaasatigut artukkerneqarnermut oqilisaataasinnaasunik.

Qilanaaraarput tusassallugu, suut aalajangersimasut Naalakkersuisut aammalu Inatsisartuni partiit suliniutiginiarneraat peqqinnissaqarfitta maannakkut inissisimaneranut iluaqutaasinnaasut aammalu siunissami, suli sulisussaqaarniarnermut unammilligassat ilungersunarsissammata nunarsuarmi piffinnut allanut sanilliullugu.

Oqallilluarnissaq qilanaaraara.